

Ч. 30. (114.) Крыница, четверг дня 6. серпня (24. липня) 1936. Рок III.



Орган Лемковского Союза.

Выходит в каждый четверг.

Редакция и администрация в Крынице. — Адрес „Лемко” Крыница.

Всіх читателів, котрі не ввели ще пренумерату, просиме виворонити якнайскорше рахунки.

Пренумерата в краю:
30 грошей місячно,
80 „ квартално
1.50 „ полрочно,
3 зл. рочно.
В Америкі: 1 дол. рочно.
В Чехословаччині:
2 кор. місячно, 10 кор. полрочно,
20 кор. рочно.
Ціны оголошень:
Ціла сторона 120 зл., 1/2 сто-
роны 60 зл., 1/4 стороны 35 зл.,
1/8 стор. 20 зл., 1/16 стор. 10 зл.;
оголошення малы за 1 мм. 20 гр.,
в тексті 30 гр., перед текстом
40 гр. При місячном и долгом
оголошені значна знижка.
Контото чековє Нр. 404.155

Што можна екзекуво- вати у селян.

Часто случат ся, же податкови екзекуторы записуют селянам такы предмети, котрых не мають права записати.

Штобы положити конец тым надужитям, Министерство Финансов росослало недавно всім скарбовым урядам обіжник с 25.V. 1936 Р. Л. Д. V. 6504/136, в котром ище раз припоминает, чого не могут селянам екзекувати податкови екзекуторы.

Передовсем не мають они права записати и продати инвентара живого и мертвого, а также землеплодов у селян. Могут заняти лем надвыжку тых движимостей понад норму, усталену для поодиноких округов через Скарбовы палаты на основі обіжника Министерства Финансов с дня 1. лютого 1933. Л. Д. V. 386/133. В жадном случаю не можна заняти селянину коня, коровы, свині и т. д., если находят ся они на господарстві в одной штуці каждого гатунку звірят.

Понадто Минист. Фин. подає, же в разі занятя надвыжки живого инвентара, записаны звірята могут быти забраны с господарства и отданы под присмотр особы третьей лем в том случаю, если податник уж передом записану движимость змарніл або усунул, так, же заходит опасность поновного усуненя и ростраты. Во всіх других случаях не можна забрати с господарства записаного живого инвентара. Не относит ся тото до тых случаев, коли забране звірят єст основане конечном потребом в ціли продажи тых звірят, але и втотчас забрати звірята с господарства можна не скорше, як того вымагат час, потребный на допровадженє звірят до місца продажи.

При конци обіжника єст приказ, штобы тоты приписы сильно перестеригати и за-

повідь, што провинивши ся против тым приписам будут остро караны.

Якы будынки в селах подпадают податкови от недвижности.

В силу зарядженя Министра Финансов на терені громад сельских податкови от недвижности подпадают:

А) будынки незвязаны с господарством рольным, огородничим и лісным и то:

1) мешкальны дома (вилі, дома для літників и т. п.) и други (торговельны, выарендованы на школы и т. д.) разом с належачими до них побочными будынками, пляцами и дворами.

2) Будынки с дворами и пляцами, занеманы через промысловы заведеня, подпадаючи державному промысловому податкови с выключенєм рольничих горелень.

Б) будынки звязаны с господарством рольным, огородничим або лісным разом с належачими до них побочными будынками, дворами и пляцами, котры:

1) сут стало вынаниманы в цілости, або в переважающей части и складают ся больше, як с 4-ох комнат.

2) сут выдержавяны отдільно от господарства рольного, огородничого або лісного. Через „дворы и пляцы” розуміє ся грунты под и меже будынками и грунты коло будынков, нпр. грунт меже будынком и до-рогом.

Будынки, звязаны с господарством рольным, огородничим або лісным, вынаныты сезоново не подпадают податкови, хоц бы складали ся больше, як с 4-ох комнат. Будынок, вынанытый больше, як в половині поверхні, уважат ся за вынанытый в переважающей части.

Кредыты для селян на сельске будовництво.

Пожичкы на ціли сельского будовництва будут уділяны на слідующих условиях:

1) Будовляны пожичкы могут достати селяне, котры мають господарства о пространстві не большом як 20 га, а на терені всходных воеводств 35 га. Поділ кредитов на воеводства переведе Центральна Каса „Spółek Rolniczych” за апробатом Мин. Рольн. и Реформ Рольн.

2) Максимальна высота пожичкы на одно сельске господарство не може перевысшити сумы 800 зл.

3) Пожичку мусит ся оддати в термині не долшом, як 15 літ, при чом в першом році не мусит сплачати капиталу, лем сам процент.

4) Кредыт мусит быти обезпеченый што-найменьше должным скрыптом должника, зарученым через маєтково ответственный особы.

5) От пожичок буде ся платити 4 процент рочно.

Поданя треба вносити до „Centralnej Kasy Spółek Rolniczych” Варшава, Варецка 11-а,

Кредыты на водны роботы.

В приготовленном пляні 4-літних публичных работ Perezначено великы сумы на водны роботы. С грошей тых Perezначено 2-миллионы злотых на регуляцію горских потоков, с чого 800 тысяч мають коштovati роботы водны в воеводстві краковском, 450 тысяч — в воеводстві львовском и 650 тысяч — в воеводстві станиславском. На роботы портово-водны коло Варшавы Perezначено 900 тысяч зл., на регуляцію Варты в воеводстві лодзком и познанском — 650 тысяч зл., на канал нотецкий 500 тысяч зл., на регуляцію Вислы в воеводствах краковском, келецком, любельском, варшавском и поморском — 2 миллионы 800 тысяч зл., на королевекый канал — 1 ми-

лион, а на канал Августовский, ріку Буг, Горынь и Стыр — 450 тисяч зл.

Роботи тоты мають також на цілі дати роботу місцевим селянським безробітним, щоб об'легчити їх тяжке положення.

Ніт українського языка и народа.

Перед пару тижнями Верховний Суд в Варшаві видав вирок в ділі одного українофила, котрий заскаржив військовій власті о того, же в книжечці військової вписано його, яко русина, а не українця.

Справа перешла всі судові інстанції и оперла ся аж о Верховний Суд, котрий орек, же под національним взглядом ніт „українців“, лем русини, а язык их єст руский, а не „український“.

„Il. Kur. Codz.“, доносячи о том, називат таке перекручанє историчних фактов „językowem niechlujstwem“ и подає, же назву „українець“ и „український“ допущено, щоб догодити політичним тенденціям „українських“ націоналістів, вопреки историчной и етнографичной правді и вопреки обов'язуючим законам.

Важне для селян- должников.

Дня 31. жолтня минат термін роблення конверсійних договорів.

Центральне Бюро до Справ Финансово-Рольних припоминає властителям селянських господарств, же термін закінчення конверсійних договорів через Банк Акцептаційний минат дня 31. жолтня 1936. Незаключенє договора с кредитним інституціом до того терміну поводє утрату прав должника до сконвертованя свого долгу на основі відолженньових законів и може наразити на заплата цілою повинною суми.

На возванє кредитної інституції треба ся явити безотложно в цілі закінчення договора, а єсли банк або кредитна каса не схоче закінчити договора, треба в бюрі до справ финансово рольних постарати ся о посвідченє, же договора конверсійного не закінчено с вини кредитної інституції.

Число неграмотных на світі.

В рочнику медженародной статистиці, видаванім через Лигу Народів сут подані цікаві цифри о анальфаетизмі на світі.

Понеже діти ниже 10 літ не входять в рахубу при укладаню того рода статистиці, прото относит ся она до населеня в віці понад 10 літ.

Серед населеня Франції в віці понад 10 літ єст 5.9 процент не уміючих читати и писати, Америка полночна має 6 процент неграмотних, Чехословакия — 7.4 процент, Бельгія — 7.5 проц., Естонія — 10.8 проц., Венгрія — 13 проц., Латвія — 18.8 проц., Італія — 26.8 проц., Литва — 32.7 процент, Польща — 32.7 проц., Болгарія — 39.7 проц., Іспанія — 43 проц., Греція — 43.3 проц., Росія — 48.7 проц., Мексык — 64.9 проц., Португалія — 65.2 проц., Бразылія — 68.1 проц., Брытійскы Індії — 90.6 проц.

В Німеччині, Англії, Голяндії, Швайцарії и в краях скандинавських серед населеня понад 10 літ ніт праві совсем неграмотных.

Процент неграмотности єст безпорно барз точным пробирчиком культури.

Серед європейських держав Польща має процент неграмотных оден с найвысших, близький максимального. Цыфра 32.7 проц. означат, же серед населеня Польщі в віці понад 10 літ — каждый третій не уміє читати и писати.

Вынаходчи державы.

Американський інженер, Вестерн видає книжку, в котрій описує винаходы и винаходчиков ріжних держав.

Єст 6 держав на світі, славных с ріжних винаходів. Перше місце займає Америка, пак идуть Німеччина, Англія, Росія, Франція и Італія.

Талергофске торжество в Поворожнику.

Як уж в попередних числах „Лемка“ подано, дня 9. серпня т. р. отбуде ся в Поворожнику Талергофске свято.

В програмі торжества єст предвиджене вбиванє гвоздей в памяткову доску. Гвоздями називають ся металевы таблички, на котрых сут выриту імена и назвіска талергофців а также всіх тих, котры были вязнені, розстріляні, або повішені в часі світової війни. Доска с тима гвоздями яко памятка их мученичества, буде повішена в салі читальні ім. М. Качковського в Поворожнику. Імена тих мучеників буде упоминати ся при поминальних богослуженнях, які буде ся служити кожного року в день общого Собраня членів читальні.

Талергофске торжество являть ся народним святом и на нем повинні явити ся людє с цілого повіта, а передовсем родини талергофських мучеників. Их обов'язком єст закупити гвозді до памяткової таблиці, котры належит замовляти у г-на Григорія Паньчака в Поворожнику п. Мушина по ціні 70 грошей за штуку.

* * *

(В оголошеню подано 50 гр.; тимчасом показало ся, же в ціні той не можна достати гвоздей и ціна мусит быти подвышена на 70 гр.)

Розрухы во Відні.

Дня 29. липня в часі олімпійского торжества на „Площі Героїв“ во Відні, в котром прийняли участь: президент Микляс, віцеканцлер Баар-Бааренфельс, всі члєны правительства и кн. Штаренберг, дали ся чути во всіх сторін провокаційны крики, голошені мегафонами. Оклики тоты походили от членів партії народово-соціалістичной.

Члєны правительства вицофали ся с „Площі Героїв“, где дошло до кривавих розрухів. В часі тих розрухів ранено парунадцєтох поліціантов.

Полиція арестовала в зв'язи с тима розрухами около 500 людєй. Правительство

заявило, же выступит строго против замішаным в розрухы. Вздєржано также приміненє амнестії, яку выдано недавно.

РЕВОЛЮЦИЯ В ИСПАНИИ.

Испания распалат ся на дві республики.

Тото, што діє ся тепер в Іспанії, єст, здає ся, найстрашнішом братоубийственным войном на світі. Члєны тих самих родин воюють по обох сторонах. Очевидці розказують о таком случаю, же отец соціяліст розстріляв сына-фашиста. Розгорычена тым мати выпалила отцу очі кыпятком и сама убила ся.

В Мадрыті мають діяти ся страшны річі. Помимо того, же Мадрыт находить ся в руках правительства, в місті переважають симпатії для повстанців. Раз ведено улицями повстанців. Розстріляно их публично для постраху. Втотчас толпа шмарилася на езекуційный відділ и вымордовала всіх воєвків. С окон домов падають стрілы на правительственны войска, котры реванжують ся так, же высаджують в воздух цілы дома.

По інших містах діє ся тото само. Нікто не єст певный житя, бо найменше подозрінє выстарчит, жебы перенести ся на тот світ.

По донесенням с Іспанії, стає ся певне, же домашна війна потрєват ище долго. Силы обох сторін сут праві такы самы и не можна надіяти ся скорой побіды одной, або другой сторони.

Послідством того положеня буде, як предвиджують парыскы газеты, фактичний поділ на дві державы. Поділ тот буде мати характер політичний, соціальный и господарчий, але не терыторіальный, што сильно комплікує положенє, бо провинції „червєных“ будут попреділяны провинціями „білых“.

Уж тепер существуют два правительства, с котрых każde переводит на власну руку реформы. Так нпр. повстанче правительство привернуло науку религии в школах и знесло 40 годинный час работы в тиждні.

Правительство повстанців навязало переговоры с гдєякими державами, стараючи ся о того, чтобы его признали за законне правительство Іспанії. Быти може, же Італія и Німеччина признают тото правительство и перервут отношеня с теперешным правительством в Мадрыті.

Таке положенє в Іспанії може выкликати поважны комплікації в медженародной політиці.

ВАНДУ ПАРЫЛЕВИЧ ПЕРЕВЕЗЕНО ДО КРАКОВА.

Дня 30. липня перевезено с в'язниці в Тарнові Ванду Парылевич и Флейшерову и поміщено их в в'язниці св. Михаїла в Кракові. Перенесенє тото послідовало на желанє судії Корусевича, котрий, живучи в Кракові, хоче с нима мати сталый контакт.

Д.Б.

Почирали ся на жены и достали ся до криминалу.

„Гей ты цыган шалений, чирайме ся на жены! Дам ти стару за младу и капусту заграду“. Тота пісня припоминає ся, коли читат ся, як то в Румунії дві хлопські родини, жиючи с собою отдавна в приязни, постановили заключити меже собою незвичайний договір. Хлопы рішили почирати ся на жены. Виміна тота мала початково пробний характер — на 6 місяців.

Жены обох хлопів згодили ся охотно на тоту чиранку, подписали договір своїх мужей и каждая с них перешла до хаты нового мужа.

И всьо было бы в порядку, если бы не зашла одна нежданность, а именно: одна с вычираних жен уж по місяці начала скаржити ся, же новий муж бє ю. Она рішила вернути до свого давного мужа. Але друга пара не хотіла згодити ся на таку скору зміну. Зажадано от ней, чтобы выдержала по крайней мірі 6 місяців.

Однак муж „на пробу“ не мал совсем наміреня перестати бити жену, в виду чого она донесла о том влястям, котры приарестовали обох хлопів, чтобы в криминалі отпокутовали за неморальный помысл.

Якы роботы сут в саді.

Ріжно удержує ся сады. Не звертат на тоту жадег господар велику увагу, бо до тепер не было у нас великих садов, а тых пару дерев коло дому были радше для розрывкы дітям, чим для користи господаря.

Аж по переведеной комасации начинают селяне заводити большы сады и тому тепер повинни ся они познакомити с рациональным их веденєм, чтобы мати с них не лем приятность для дітей але и користь для себе.

До тепер в садах под деревами был все травник и дерев не навожено цілковито. В таких садах вроды бывають звычайно раз на пару літ, а и втотчас може дві третины овочей идут на марне по поводу гнитя, хробачливости и недорастаня до торговельного качества. Кто має у себе такий сад, або видит его у сусіда, тот знає, же так єст напавду.

Штобы овочевы дерева родили каждого року и давали породны овочи, треба дати деревьям добры условия для их развития и выдаваня овочей, — треба впровадити механичну управу землі в саді, получены с сильным навоженєм и плеканєм отвітных рослин.

Травник в саді треба доконче заорати на цілом пространстві саду, бо травник служит за крыєвку ріжним шкідникам и заберат деревьям воду и корм, поменьшаючи таким способом можность у дерев доброго и тревалого выдаваня овочей.

В молодом саді треба плекати меже деревами ярину, трускавки, або окоповы. Передом треба ціле пространство меже и под деревами добре погноити. Можна также засадити космачи (агрест) и винничкы, або ярины тревалы, як шпврагы и рабарбар.

В старых садах, котры дают уж овочи, держати в першой половиці літа оранину и аж коло св. Ивана высіяти на зеленый навоз до осенного приораня лубин, выку, татарку, або аж и жито, або мішанку (овес — выка — горох). Татарка даст пожиток пчолам.

В садах треба памятати о сталом и обильном навоженю: в молодом саді давати мерву под ярины; особенно сильно и каждого року треба навозити рабарбар, шпврагы, космачи и винничкы.

В липні, наилучше до 15 липня навозити штучным навозам, легко роспускальным, памятаючи о том, же в другой половиці літа на деревьях образуют ся квітовы очка не квітненє в слідуячом року.

При навоженю штучным навозам треба дати на 1 гектар саду 100.—150 кг. вапневой салитры и супертомасыны и потасовой соли по 300—500 кг. каждого с тых навозов. Выдаток на тоты навозы вернут ся слідуячом року с процентом.

Повысши навозы можна перед высіанєм вымішати а по розсіаню приборонити. Если в старом саді были засіаны рослины на приоранє на зеленый навоз, то вычислены штучны навозы треба розсіяти перед высіанєм тых рослин.

Як кормити куры.

Куры кормлены бандурками ядудт запасы, але не несут ся, або несут ся мало. Кура на продукцию яиц потребує дуже

білка и того білко муєят достати в кормі. Кормленє самыма бандурками при доданю аж и отруб або зерна не покрывє білковых потреб куры, бо тот корм, а особенно бандурка має мало білка.

Штобы кура несла ся добре, мусит она достати каждого дня:

мясной мучкы	6 до 8 г.
зерна	50 „
отруб	20 „
бандуркы	30 „
меленых костей	10 „

Вмісто мясной мучкы можна курам давати зберане молоко (около $\frac{3}{4}$ шкляны на 1 куру денно).

В зимі кромі того дає ся курам 20—30 г. на штуку половы с коничу, а літом зеленый корм, котрый куры збирають сами, пасучи ся коло хат.

Так кормлены куры не запасають ся и несут ся каждого дня.

Дзвонят серпы и косы.

Уж и в горах начали ся жнива. От свиту до ночи дзвонят по полях косы и серпы. Стружены тяжком роботом косары обтирають пот и кладут покос за покосом. В том році лица их веселы, бо Всевышний дал красны вроды. Зародила ся озимина и ярина, выросли травы на луках, добре заповідает ся окоповы. Кобы лем выдержала в часі жнив погода, буде полно в стодолі и сыто при столі. Може кус отдохнут селяне, тым больше, же ціны зерна в том році заповідает ся добре. Причином того єст страшна спека и посуха в Амерыці, котра звычайно регулює світовы ціны зерна.

Также и живина має в поелідных часах лучшу ціну, в виду чого можна надіяти ся поправки у людей.

Дзвонят косы и серпы по полях. Дай Бог, чтобы выдзвонили они лучшу долю селу.

Звич. Обще Собранє

ЧЛЕНОВ О-ВА РУСКА БУРСА
В ГОРЛИЦАХ

отбуде ся в четверг 27. серпня 1936

о год. 10 рано в помещенію бурсы с слідуячом програмом дня:

1. открытє Общого Собрания и выбор презыдии,
2. отчитанє и принятє протокола послідн. Собр.
3. доклад о діяльности и касовый отчет,
4. доклад контрольной комиссии,
5. дискусия над докладами и уділенє абсолютории,
6. выборы нового правления и контр. комиссии,
7. предложєня членов и
8. закрытє Общого Собрания.

Если в означеном часі не збере ся вымагана статутот число членов, то слідуяче обще собранє отбуде ся того самого дня с том самом програмом о год. 11-ой.

Особных повідомлень — не розсылат ся.
Правленє О-ва

Пчобы загрызли 4-літнього хлопчика.

Страшне и рідке событє мало місце в одном селі на Поморі.

4-літний сынок М. Коцимского бавил ся в огороді и в том часі напал на него рой пчол.

В пару секундах пчолы покрыли хлопчика грубом верством, вбиваючи єму жала в ціле тіло. Крик хлопчика почула мати и выбіжала ку нему. Пчолы обсілы ю и пожалили сильно. Мати хопила непитомну уж дітину и занесла до хаты.

Закликаний лікар не потрафил спасти дітины. Хлопец умер.

Баба дітины, 69-літна старуха переняла ся так смертю хлопчика, же достала удар сердца и также умерла.

С'їзд представителей горских регионов в Сяноці

в днях от 14—17 серпня т. р.

Головный Комитет „Свята Гор“ рішил организовать:

- 1) С'їзды представителей горских регионов в малых розмірах каждого року,
- 2) Што два roky великы с'їзды, подобны до прошлорочного в Закопаном.

В том році отбуде ся с'їзд в малых розмірах в Сяноці в днях от 14 — 17 серпня. С'їзд згромадит представителей всіх горских регионов в цілі взаимного познакомленя ся и принятя ухвал в ділі діяльности и развития основаного Т-ва, названого „Союз Горских Земель“.

Предсідательство Организационного Комитета обнял Министер Воєнных Діл ген. дыв. Т. Каспржицкий, а ааступником предсідателя выбрано вицеминистра комуникации инж. Александра Бобковского.

ПОМІЩАЙТЕ
ОГОЛОШЕННЯ
В ГАЗЕТІ „ЛЕМКО“

Що чути в світі.

Революція і домашня війна в Іспанії.

Барцельона: Комунисты в Барцельоні нищать маєтки правих партій, підпалюють костели і монастири. Католицьких священників вимордовано. Така сама судьба зустріла офіцерів барцельонського гарнізона, котрих убили скомунізовані вояки. Число убитих в Барцельоні подають на около 1000 людей.

Парыж: С Мадрыта доносять, же в часі уличної борби в ночі на 24.VI. заатаковано автомобіль польського посольства в Мадрыті. До автомобіля, а пак до будинку посольства отдано около 30 стрілов. Жертв в людях не было.

Мадрыт: Бой меже правительственными войсками і повстанцями идуть в 50 км. от столицы. Обі сторони числять ся с тым, же домашня війна потребає місяц, а може і долше. Дотепер число убитих выносит около 3500 людей. Повстанцы утворили своє правительство с ген. Моля во главі. Правительство того резидує в Бургос в полудневой Іспанії. Администрация цивильна на теренах занятых повстанцями єст переважно вірна правительству, але войско часто симпатизує с групом генер. Франко. Правительство вооружає роботников.

Москва: Совітскы летчики: Байчуков, Чкалов і Беляков, котры выстартовали до окружного лету с Москвы, опустили ся на землю на запад от Николаєвска над Амуром, удержуючи ся в воздуху 56 годин 20 минут. В часі том перелетіли они без опадання на землю 9.374 км. В часі лету мусіли они перебороти величезны перешкоды. Коло „Сіверной Землі“ самолет попал на арктычний циклон і густы хмары. Через 5 годин летчики пробивали ся через хмары, возносячи ся на высоту 4 тысяч метров і летячи совсем сліпо. Вітер гнал страшный і самолет покрыл ся льдом. Долетівши счастливо до Петропавловска на Камчатці, самолет шмарил пересылку. Над Охоцьким морем самолет попал в стрелу сильного полудневого циклона. Коли власти довідали ся, же лет єст веденый в особенно трудных условиях, выдали через радио порученє перервати лет. Самолет опал на землю серед густой гмлы на малом острові коло Николаєвска. Самолет тот єст конструкции совітского инженера А. Н. Туполева і носить назву „А. Н. Т. 25“ С 9374 км., які перелетіл самолет, припадат на лет над морями около 5140 км. Летчики сут здоровы, самолет в порядку.

Букарест: Мин. Титулеску заявил букарестыньскым газетарам, же не принял на себе собовязаня, же позволит на свободный перемарш совітских войск через румынскую территорию. Справа тот не была николи предметом переговоров.

Рым: Агенция Стефани доносить, же комиссия до розслідування богатств Менелика ствердила, же находят ся там тепер лем книги, диваны і предмети религийного культу. Всьо того отдано до распорядимости коптійского священства. Самы богатства забрал до Европы негус.

В Неаполі одна уперта 21-літна англичанка помиме остережень сідила через 10 годин на сонці. Коли вернула до хаты, заморочило ю. Дознала она сильного попарення на цілом тілі і што найсмутнійше, стратила розум.

Льондон: Англицка газета „Manchester Guardian“, маюча все добры информации политичны, оголосила тайный меморіал німецькой партии народо-соціалістичной. Меморіал меже другим пише также о скором прилученю Гданска до Німеччины, причом предвиджує ся гдеякы „гваранции“ для Польши і постепенной ликвидации цілого версальского трактату.

Німеччина приготавлиє ся до войны. Во всіх векших містах, где стоят гарнізоны німецького войска, будують днем і ночью на три зміны величезны елеваторы і магазыны на зерно. Переважно будує ся их под землем і сут они осмотрены в найновішых техничных устройствах.

Льондон: Король Едвард VIII. зрезыгновал с выїзда на французску Ривьєру. Так само председатель англицьких министров Бальдвин не выїзджат в том році на урляп. Крок тот поясняють собі непевным политичным положенєм в Европі.



Вісти с краю.

Варшава: Куратор Окр. Шк. Краковского г-н Гонецкий єст перенесеный до Вильна, а на єго місце назначено г-на Стыпинского, начальника выділа с министерства віроисп. і просв.

Варшава: В звязи с вістями о заименованю министра Зындрам-Косцялковского воєводом [львовским] газеты варшавскы пишут, же мин. Косцялковский поставил условия, под якіма згодил бы ся принять стьяновиско львовского воєводы. Ведля тых газет мин. Косцялковский жадат росширення прав на становиску воєводы так, штобы центральны власти не противили ся, если он дойде с украинцями до гдеякой угоды.

Варшава: Агенция „Искра“ доносит в звязи с поголосками о возможности поворота Витоса до краю і приміненя до него амнестиі, же тоты поголоскы сут неправдивы і же Витос може вернути до краю лем по того, штобы отсідити вымірену єму судом кару.

Варшава: В политичных кругах росошла ся поголоска о возможности скликаня в вересні незвычайной сесии. Сесия тот мала бы вскріпити основы для ширшой акции проправительственного обозу.

Варшава: Министерство Правосудия выдало поясненє, в котром подає, же найнижша оплата за впис в цивильных процесях в окруженных судах выносит 10 зл.

Варшава: В серпні буде огошений новый паспортный закон. За границу можна буде вывозити лем 200 зл. а заграничный паспорт буде коштувати 50 зл. на місяц.

Поворот роботников с Латвии. С многих галицких повітов выїхало килька тысяч ро-

ботников і роботниц до Латвии на работы в поли. Однак уж по пару неділях вертають назад, бо условия работы сут там не до выдержаня. До работы треба было ставати уж о год. 3-ой і робити до год. 11-ой в ночи. Кормили их якомси бандурчаном полизком. Крім того треба было робити в неділі і свята.



Талергофске Торжество.

Дня 9-го серпя т. р. читальня им. М. Качковского в Поворознику устроує ТАЛЕРГОФСKE ТОРЖЕСТВО.

Програма торжества слідуєча:

- 1) о год. 1 1/2 по полудни сходка в домі читальні.
- 2) о год. 2 по полудни поход на кладбище.
- 3) о год. 2 1/2 по полудни панихида.
- 4) По панихиді промова, посвяченя памяти мученикам світовой войны і вбиванє гвоздей (металевых табличок с назвисками мучеников) в памяткову доску.
- 5) Поход с памятковом таблицом до читальні.
- 6) Академия в читальні.

Торжество має характер повітового свята. Выділ читальні дал поробити металевы табличкы (гвозді) с назвисками всіх талергофцов і всіх мучеников світовой войны с цілого повіта новосандецкого. Гвозді тоты буде вбивати ся в памяткову доску, котру пак повісит ся в салі чит. в Поворознику.

Гвозді с назвисками талергофцов вбивають власноручно самы талергофцы. За погыбших, померших або неприсутных гвозді вбивають члены их родин.

Гвозді с назвисками талергофцов будут уложены в надпис: В память рускым страдальцам Талергофа 1914—1918“.

Замовленя на гвозді с отвітными надписами высылати до чит. им. М. Качковского в Крыници-Селі на руки г. Алексія Громосяка, або до чит. им. Качковского в Поворознику, почта Мушина на руки г. Паньчака Григорія.

Гвозді роздаст ся в день свята в чит. в Поворознику.

При замовленю гвоздей треба заплатити 70 гр. за штуку.

Выділ чит. в Поворознику.

КТО ХОЧЕ ЗАБЕЗПЕЧИТИ СЕБЕ НА
СТАРОСТЬ И РОДИНУ ОТНУЖДЫ И ГО-
ЛОДА, АБО ЗЛОЖИТИ ДІТЯМ ВІНО,

НЕХАЙ ЯКНАЙСКОРШЕ

Заасєкурує ся
в асєкураційном
Товаристві
ВИТА И КРАКОВСКЕ
во ЛЬВОВІ

Асєкурацію приймають на цілой Лемковщині представителі: гг. Осиф Яновичкий — Крыница-Село і Михаил Царелом — Сянок.